

La carotta da bio n'è anc betg spaletschada

Bio Grischun giavischa dapli bio sin ils tagliers da las mensas grischunas

ANDREAS CADONAU/FMR

■ **Bio Grischun tschertga gastronomia collectiva grischuna pronta da cuschnar cun products da bio. Demussà interess ha enfin uss il Spital chantunal a Cuira. La prontadad da betg sulet producir bio sin prada ed en stallas grischunas, mabain era d'elavurar bio en las mensas è anc detg modest.** Tar il spital chantunal a Cuira han ins bain confermà la prontadad da sa fatschentar cun la durabladad en cuschna. Cun augmentar la cumpart da mangiativas producidas en la vischinanza e sche pussaivel tenor las premissas da Bio-Suisse. La pleadadra dal spital ha ditg ch'ìl concept vegni pir elavurà uschia ch'ins na sappia anc betg communitgar detagls.

La gestiunaria da Bio Grischun, *Bernadette Arpagaus*, ha explitgà ch'ìl potenzial da cuschnas collectivs saja avant maun en il Grischun. Ella ha numnà mensas publicas sco las cuschnas da scolars ed instituziuns socialas ed auter. Diversas interpresas grischunas spigentan medemamain lur personal cun tragtas da l'atgna cuschna. «Bio Grischun vul ch'ìl chantun Grischun na saja betg mo davantier tar la produenziun da bio, mabain ch'ìls products vegnian era elavurads en las cuschnas grischunas».

Decisiuns da surengiu

Tar la gastronomia collectiva na decida per regla betg il schef ni la scheffa en cuschna, mabain ils purtaders da las instituziuns ni la gestiun da la firma davart la durabladad sin il taglier. Per quel motiv tschertga Bio Grischun la collavuraziun cun firmas ed instituziuns. «Il chantun Argovia, per exempel, ha definì ina strategia che pertutga la durabladad en las cuschnas publicas», ha Bernadette Arpagaus ditg. Ina strategia che manca al



Bler potenzial per dapli bio en cuschna regia en la gastronomia collectiva. Bio Grischun vul persvader firmas ed instituziuns publicas da sa fatschentar pli consequent cun durabladad sin il taglier.

FOTO GRISCHUN VACANZAS

«**Bio Grischun vul ch'ìl chantun Grischun na saja betg mo davantier tar la produenziun da bio, mabain ch'ìls products vegnian era elavurads en las cuschnas grischunas**»

Bernadette Arpagaus,
gestiunaria da Bio Grischun

chantun Grischun cun la pli gronda cumpart da producents da bio.

Tar Bio Suisse sa fatschenta *Reto Thörig* cun las dumondas da la gastronomia collectiva ed el vesa plaunsieu glisch verda sin il binari per dapli bio en cuschna. El frunta sin diversas resalvas tar ils schefs da cuschna. «Ils dubis pertutgan per regla il pretsch, la disponibladad dals products e la mancanza da products pre-elavurads». Reto Thörig ha regurdà a la pussaivladad gulivar per part ils pretschs da bio pli auts cun adattar la carta da menu. «Cun resguardar la stagion da raccolta è era la disponibladad dals products segirada». Products da bio pre-elavurads per la gastronomia collectiva mancan dentant. Qua vesa Reto Thörig la necessitad da sia organizaziun da trair fil en la gugia. «Blers producents èn pronts da furnir products pre-elavurads, per exempel carottas spaletschadas, els èn dentant da l'avis che la dumon-

da manchia.» Ed il cuschiniers manegian ch'ìls products pre elavurads da bio na sajan betg sin il martgà.

Bler da l'agen manaschi

Dad ina situaziun privilegiada ha il director dal Plantahof, *Peter Kùchler*, discurrì en connex cun la cuschna da sia scola. Ina cuschna che na spigenta betg sulet scolars e scolars dal Plantahof. Numerusas participantas e participants da curs, scuntradas e radunanzas laschan gustar il genar da la cuschna dal center da scolaziun. «Circa 80 procent da las mangiativas servidas en la mensa dal Plantahof derivan da l'agen manaschi puril.» E tar l'agen manaschi puril quinta Peter Kùchler era ils legums furnids dal bain puril da la praschun a Realta. «Quai che pertutga la cumpart da mangiativas da bio en nossa cuschna essan nus sin buna via». Peter Kùchler ha per exempel menziunà la plipart da la charn che deriva da l'agen manaschi. «Uschè lunsch sco pussaivel cumpra il Plantahof las mangiativas d'ordaifer en qualitad da bio ed en Svizra».

Manaschi d'exempel

Peter Kùchler è conscient da la responsabladad e funcziun d'exempel dad in center da cussegliazion e scolaziun agrara dad in chantun che posseda ina cumpart da manaschis da bio da sur 60 procent. L'atgna viticultura producescha da nov il vin tenor las prescripziuns da Bio-Suisse. «Per il manaschi puril a Realta cun la produenziun da verdura è in studi da realisabladad pendentia che duai mussar la via a la produenziun ecologica.»

Che la verdura dal bain da Realta vegniss producida en qualitad da bio, beneventass era Bernadette Arpagaus. «La dumonda per verdura da bio è gronda». Uschia ch'ella spera che la studia da realisabladad na restia betg sulet in document per l'archiv.